



**अंतर्राष्ट्रीय महिला दिवस ता लड़ाइ ता पिड़ि तुन मुन्ने ओयकल!**  
**महिला पोरो ताकना ब्राह्मणीय हिंदू फासीवादी हमला ता खिलाफ ते**  
**संगठित आसोरे संघर्ष तुन तेज कीयकल!**  
**‘दलित, आदिवासी, महिला लोर लूटी आयना साटि इल्लेर, सत्ता**  
**पोरो हक साटि मंतोर’ इंजि वेहतकल!**

## क्रांतिकारी आदिवासी महिला संगठन ता आह्वान!

अंतर्राष्ट्रीय महिला दिवस तुकु संघर्ष ता इतिहास मंता। महिला ना मुक्ति संघर्ष दिवस लेक्का इदिन मानेमांतोर। शोषण, उत्पीड़न तल मुक्ति साटि संघर्ष शुरू कीत्ता मेहनतकश महिलांग ना संकल्प दिवस आंदू 8 मार्च। पूजिवाद व्यवस्था शुरू आत ते लोत्तल पेसिसि फाक्टरी मजदूर बनेमात्ता मेहनतकश महिलांग तमा हक साटि प्रदर्शन चालू कीत्तांग। महिला मजदूर लोरा पहली अधिवेशन 1909 फरिवरि 28 तारीख ते ताकता। 1910 ते कम्युनिस्ट इंटरनेशनल ता नेत्रि कॉमरेड क्लारा जेटिकिन ना नेतृत्व ते कोपेनहेगेन ते 17 देश तल 100 प्रतिनिधि लोरा संगे सोषलिस्ट महिलांग ना अंतर्राष्ट्रीय अधिवेशन सफल आत्ता। इद अधिवेशन लोपा 8 मार्च तुन अंतर्राष्ट्रीय दिवस लेक्का मानेमायना इंजि निर्णय आत्ता। अदिना पेरके 1917 अक्टूबर क्रांति ते रोटी कपडा साटि ताकता ऐतिहासिक संघर्ष लोपा अलेक्जान्द्रा कोल्लंताय नेतृत्व तल महिला सक्रिय रूप ते शामिल आत्तांग। रूस ते जार राजा ना तानाशाह तुन मुट्टि कीसि दुनिया ते पहली बार बनेमात्ता सोषलिस्ट समाज लोपा महिलांग कुन वोट हक ना संगे संगेने वेलय क्षेत्र ते समान अधिकार वात्ता।

भारत देश ते इसाइ पूर्व 1500 ते आर्यालोर वात्तगटल नेंड, इतेके 2018, मार्च 8 एवनल पितृसत्ता ता रूप, सार बदली आसोरे नेंड ब्राह्मणीय हिंदू फासीवादी केंद्र, राज्य सरकार कुना लोपा सत्ता ते वात्तोर। मानव विकास चालू आत्ता समय ते पशु पालन कीयना संचार जीवन ता समाज लोपा पितृसत्तात्मक समाज, कृषि प्रधान समूह मत्ता मूलवासीरा लोपा मातृसत्तात्मक समाज मत्ता। इ.पू. 1500 ते आर्यालोर सिंधू नागरिकता पोरो हमला कीसि पय्या विस्तार आत्तोर। उत्पादन शक्ति ता विकास संगे संगे ने वात्ता पितृसत्ता ता पद्धतिंग, भावनांग कुन इ.पू. 600 ते मनु इन्चलोर मनुस्मृति पोरोय ते रासिसि मत्तोर। वर्ग समाज पुटतगटल महिला कुन अधिकार स्थान तल द्वितीय स्थान ते दोबसित्तोर। जमने जमने महिला सामाजिक श्रम तुक जेक आत्तांग। इद क्रम लोपाने संपत्ति संगे पिल्ला पेकोरा पोरो वन्ने हक इल्ले। नेंड मनु ना पिड़ितोर वेलाय मौखा ते तमा महिला विरोधी इतिहास तुन पेसि कीसोरे मंतांग। रेंड दशाब्दि मुन्ने ‘केल्कु कोरिताविनु संसद लोपा वाया ईयनायो’ इंजोरे केल्कु कोरिता महिला संसद सदस्थीर कुन पासकतोर। नेटा संसद ते महिला कुन 33 प्रतिशत आरक्षण ईयना बिल सत्ता ते मंदना वर्ग ना नड़मा जगडांग ने फसेमात्ता।

पुनरुत्पादन शक्ति तुन महान शक्ति लेक्का आलस्ता आदिम समाज ते महिला कुन शक्ति लेक्का मानेमात्तोर। ‘यत्र नार्यतु पूज्यंते तत्र देवता सभ्यता’, इतेके बगा इतेके महिला कुन मानेमांतोमो अगा देवी देवतांग कुशी आंतांग इत्तोर। पय्या महिला नेली लेक्काटद इत्तोर। नेली तनक तनाये पंटा तुन ईया पर्वो, पुरुषलोर विज्जा वीत्तेकेने पंटा वांता। बोर इतेके विज्जा वीत्तितोरो ओरदे पंटा इंदना मनुवादी विचार महिला ता पुनरुत्पादन क्षमता पोरो पुरुष सत्ता तुन निलिपि कीत्ता। महिला कुन तना पिल्ला पेकोरा पोरो हक इल्ले। मार्क्सवादी महान गुरूजी कॉमरेड एंगेल्स इद महिला कुन ऐतिहासिक हार इत्तोर।

वेद काल तल नेंड एवनल महिला वेद पड़ेमायनायो इंजि प्रतिबंध तास्तोर। शिक्ष तुक जेक कीत्तोर। गार्गि, मैत्रेयि लेक्काटा बुद्धिजीवि महिला ना तोड़िन बंद कीत्तोर। इद रूढ़ी (इतेके कट्टर विचार) तुन खंडन कीसोरे भारत देश ते पहली बार महिला कुन पड़ाइ एविसि कीत्तद ज्योतिबा फूले, सावित्रीबा फूले आंदूर। ब्राह्मणवादीरगड़ल वेलाय अपमान तुन सामना कीसोरेने ओर इद काम कीत्तोर।

दलित, आदिवासी, महिलालोरा पोरो दबाव, अत्याचार कुन मनुस्मृति पूरा अनुमति हीत्ता। ‘दलित, आदिवासी, महिलांग उत्पीड़न आयना साटिये मंतोर’ इत्ता। वेद कालम तल नेंड एवनल वेद भूमि पोरो श्रामिक जनता पोरो ब्राह्मणीय जाति उत्पीड़न लागू आसोरे मंता। मनु ना पिड़ितोर मोहन भागवत, नरेंद्र मोदी,

डोर गंवार  
नारी  
ताड़न के  
अधिकारी



गुरु मनु चेला मोदी

अमित शा जनवादी, लोतांत्रिक भारत देश तुन पूरा बदली कीसि भारतीय समाज तुन भगवाकरण कीसोरे मंतोर। मनुस्मृति तुन भारत संविधान लेक्का, भारत देश तुन हिंदू राज्य लेक्का घोषणा कीयला तयार आसोरे मंतोर। अदिना खिलाफ ते संगठित आसि लड़ेमायना जरूरत मंता।

मनु तयार कीत्ता नियम इसाब ते महिला ना स्थान इद्रम मंता। 'कार्येशु दासी, करणेशु मंत्री, भोज्येशु माता, शयनेशु रंभा' इत्तोर। इतेके महिला सेवा कीयना दासी लेक्का तना मुज्जोनकु, ओना परिवार कुन सेवा कीयना। तना मुज्जो ना काम लोपा मंत्रि लेक्का मदत हीयना। यायल लेक्का ओन किन अटसीयना। ऊंजनस्के समय ते तना मेंदुल संगे पुरुष कुन कुशी कीयना। अद्रमे 'कौमारे पिता रक्षितह, यौवने पति रक्षितह, वृद्धे पुत्र रक्षितह' इत्तोर मनु। इतेके महिला पुटतगटल स्वतंत्र इसाब ते मंदनायो। पुरुष ना दड़िमि तेने अविना पिस्वड़ मंदना। उडला मत्तस्के बाबोना राका ते, लेय्या आत्तस्के मुज्जो ना राका ते, मुइत्तस्के मर ना राका ते मंदना। मर्मी आत्तस्के दोहतना कमका ऊस्ता डोरी (हिंदू धर्म ते इद्रम कींतोर) कैकासरा (पग्गाम) लेक्कटद आंदू, अदिना संगे महिला कुन दोहसि तासना इंजि वेहत्ता मनु ना पोल्लो तुन लागू कीयना राष्ट्रीय स्वयम सेवक संघ ता मुख्य सचिव सुरेश भय्याजी जोशि नेतृत्व ते काम कीयना राष्ट्रीय स्वयम सेविका संघ ता प्रशिक्षण शिबिर ते सेविका लोर कुन इद इसाब ते मातृत्व लोपा प्रशिक्षण हीयमंतोर – 'कोंदा मेहला दायनस्के तना पिल्ला साटि बाताइ तव्वो आस्ता, मति महिला बाता दोरकतेके वन्ने तना कुट्मड साटि मूटा कीसि तत्तना। इद फरक मंता इंजि समजेमायना' इत्तोर। महिला इद्रम तादिन मानेमायनदा?

2018 तुन मुन्ने मोदी तना 'मन की बात' लोपा 'वेराय मिय्याड दस मर कुन समान आंता' इत्तोर। मति परिस्थिति ऊडतेके दूसराये मंता। पिल्ला तुन पोटा लोपाने हत्या कीयना कारण ते, वैश्विक आर्थिक मंच तयार कीत्ता ग्लोबल जेंडर ग्याप, (इतेके दुनिया ते महिला पुरुष नडमा अंतर) बारे ते कीत्ता सर्वे इसाब ते भारत देश 108वी स्थान ते मंता। पिल्ला पुटतेके वेडका मानेमायना इंजि वेहतना मोदी शासन लोपा दिल्ली ते मंदना इंडियन इंस्टिट्यूट आफ टेक्नालजी, दिल्ली विश्वविद्यालय लेक्कटा उच्च शिक्षण संस्थांग लोपा महिला केरना कपडा ना बारे ते तास्ता नियम ता खिलाफ ते 'पिंजडा तोड़' संघर्ष एता लागता।

भारतीय समाज पोरो हिंदू आधिपत्य मंता। इद दबाव मड्डा तल निच्चि मंता। शोषण मंदना जोम धर्म वन्ने मंता। धर्म मानय ना विश्वास पोरो आधार आसि मंता। शोषक वर्ग धर्म तुन साधन लेक्का उपयोग कींता। धर्म ता नशा तल बाहर तत्तलाय जनता तुन मुन्ने शोषण ता खिलाफ ते ताकना संघर्ष लोपा संगठित कीयना। महिला कुन वन्ने इद्रमे कीयना। महिला मुख्य रूप ते शोषक व्यवस्था खिलाफ ते ताकता संघर्ष लोपा शामिल आसोरे पितृसत्ता खिलाफ ता चेतना तुन पोय्यना। पितृसत्ता खिलाफ ते संघर्ष कीयना।

दुनिया ते मुन्ने ताकता रूस, चीन क्रांतिंग लोपा महिलांग वेलय काम कीत्तांग। मुन्नेटा क्रांति लोप्पा इल्वद भारत देश ता नव जनवादी क्रांति लोपा महिला जनयोधा लेक्का वन्ने काम कीसोरे मंतांग। 1960 पेरके मार्क्सवाद-लेनिनवाद पार्टी ना नेतृत्व ते ताकता जनयुद्ध लोपा महिला अलग कीय पर्वचुन काम कीयमंतांग। सैनिक क्षेत्र ते सक्रिय रूप ते काम कीयमंतांग। दुश्मन पोरो साहस ते लड़ेमासोरे मंतांग। ब्राह्मणवाद महिला सशस्त्र आयना तुन मानेमायो। मति देश लोपा सामंतवाद व्यवस्था तुन, बड़ा बुर्जुवा, पितृसत्तात्मक व्यवस्था तुन, इविन चला कीयना ब्राह्मणवाद ता खिलाफ ते लड़ाइ लोपा नित्ता महिला ना पोरो दमन लागू कीयना प्रतिक्रियवादी सेनांग लोपा महिलांग कुन भर्ती कीसि जेक मंदना दण्डकारण्य जंगल तगा लोहसोरे मंतोर। फासीवादी हमला ता खिलाफ ते गटिग संघर्ष कीयनद नेंड दण्डकारण्य महिला ना मुख्य कर्तव्य आंदू।

आदिवासी इलाका लोपा आदिवासी समूह ता अस्तित्व, अस्मिता साटि विस्थापन खिलाफ ते मुट्टा पोइसि नित्तना समय एवता। जल-जंगल-जमीन-इज्जत-अधिकार संगे संगेने महिला पुरुष समानता साटि, संपत्ति पोरो, पिल्ला पेकोरा पोरो समान अधिकार साटि लड़ेमायना समय एवता। इद देश ते वर्ण व्यवस्था, अद्रमे पिड़ि ता पितृसत्ता दोहिसि मत्ता महिलांग ना संगे संगे ब्राह्मणीय हिंदू वर्ण व्यवस्था ता दबाव ते उक्का बक्का आसोरे मत्ता सब्बे महिलांग चेतना एतिसि संघर्ष कीयना इंजि दण्डकारण्य क्रांतिकारी आदिवासी महिला संगठन आह्वान हीसोरेमंता।

वाट दीदीलोर! महिला मुक्ति ता झेण्डा तुन तेहिचि पोइसि जन युद्ध ते डाका वाटसोरे मुन्ने दायकल!

- ★ 8 तल 14 मार्च, 2018 एवनल नाटे नाटे मशाल जुलूस टेण्डकल!
- ★ महिला मुक्ति साटि पुरुष मनु, ओना पिड़ितोर मोदी-मोहन भागवत-रमण सिंह-फडणवीस ना पुतला नाटे नाटे बोडकल!
- ★ नाटे नाटे ब्राह्मणीय जाति उत्पीड़न ता खिलाफ ते चर्चा, संगोष्टि ताकी कीयकल!
- ★ जल-जंगल-जमीन पोरो अधिकार मावा, इदिना लोपा आदा माटु इंजि गटिग वेहतकल!

**क्रांतिकारी आदिवासी महिला संगठन दंडकारण्य**